

ВО ВТОРНИК 4-Й СЕДМИЦЫ ПО ПАСХЕ

В ПОНЕДЕЛЬНИК ВЕЧЕРА,

На Господи воззвах: поставим стихов 6. И поем настоящия два самогласна, повторяюще первый. И Миней 3.

Глас 1:

Дланию пречистою создавый человека, пришел еси Благоутробне недугующия исцелити Христе, разслабленнаго во Овчей купели, словом Твоим возставил еси: кровоточивой же болезнь исцелил еси: хананей отроковицу стужаемую помиловал еси, и прощения сотника не презрел еси. Сего ради зовем: всесильне Господи, слава Тебе. [Дважды.]

Непогребен мертвец сый, разслабленный видево Тя, возопи: помилуй мя Господи, яко одр мой гроб мне бысть. Что ми приобретение живота? Не требую Овчия купели, не имам бо никогже влагающа мя, возмущающимся водам: но к Тебе источнику прихожду исцелений, да и аз со всеми зову: всесильне Господи, слава Тебе.

Слава, и ныне: глас 5:

Взыде Иисус во Иерусалим на Овчую купель, глаголемую иудейски Вифседа, пять притворов имущую: в тех бо слежаше множество немощствующих. Ангел бо Божий по вся лета сходя, возмущаше ю, и здравие подаваше приступающим верою. И видево Господь многовременна человека, глаголет к нему: хочещи ли здрав быти? Немощствуяй отвечааше: Господи, человека не имам, да егда возмутится вода, ввержет мя в купель: врачом издах все имяние мое, и милости улучшить не сподобихся. Но Врач душ и телес глаголет к нему: возми твой одр и ходи, проповедуя Мою силу, и велию милость в концех.

И абие, Свете тихий: Прокимен дне.

На стиховне стихиры Осмогласника, глас 3:

Просветишася всяческая Воскресением Твоим Господи, и рай паки отверзется: вся же тварь восхваляющи Тя, песнь Тебе всегда приносит.

Стих: К Тебе возведох очи мои:

Спаси мя Господи Боже мой, Ты бо всех еси спасение, буря мя страстей смущает, и бремя беззаконий погружает: даждь ми руку помощи, и к свету возведи мя умиления, яко един Благоутробен и Человеколюбец.

Стих: Помилуй нас Господи, помилуй нас:

Мученичен: Велия мученик Твоих Христе сила: во гробех бо лежат, и духи прогоняют, и упраздниша вражью власть, верою Троическою подвигшися по благочестии.

Слава и ныне: глас 8:

В притворе Соломонове, тамо слезаше множество немощствующих, и преполовившуся празднику, обрете Христос тридесять осмь лет разслаблена лежаща, Владычним гласом глаголет к нему: хочещи ли здрав быти? Немощствуяй отвецаваше: Господи, человека не имам, да егда возмутится вода, ввержет мя в купель. Он же глаголет к нему: возми одр твой, и ходи: се здрав был еси, ктому не согрешай. Богородицы молитвами низпосли нам велию милость.

Таже, **Н**ыне отпуцаеши: **По** Отче наш:.

Отпустительный тропарь, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мірови велию милость.

[Слава: святаго, аще имать. И ныне: Богородичен во глас тропаря святаго. Аще ли ни: Слава, и ныне, Богородичен, глас 3-й]

И отпуст.

ВО ВТОРНИК 4-Й СЕДМИЦЫ ПО ПАСХЕ

НА УТРЕНИ,

На Бог Господь: тропарь воскресен, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мiрови велию милость. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне; Богородичен, глас 3-й]

По 1-м стихословии, седален, глас 3:

Плотию смерть вкусивый Господи, горесть смерти пресека еси востанием Твоим, и человека на ню укрепивый, первыя клятвы одоление призывая, защитниче жизни нашея, Господи, слава Тебе.

Стих: Господи, да не яростию Твоею обличиши мене, ниже гневом Твоим накажеш мене.

Доколе душе моя, пребываеши во гресех? доколе приемлещи покаяния предложение? Приими во уме суд будущий, возопий Господеви: согреших, Безгрешне, помилуй мя.

Стих: Дивен Бог во святых Своих, Бог Израилев:

Мученичен: Сияете верою пресветлая светила святии, благочестия рачителие, страстотерпцы прехвальнии: мучителей бо не убоявшеся ран, идольскую прелесть низложиште, победу имуще непобедимую, Крест истинный.

Слава, и ныне: Богородичен:

Прибежище и сило Богородице, державная помощи мира, молитвами Твоими спасай рабы Твоя от всякия нужды, едина благословенная.

По 2-м стихословии седален, глас 3.

Подобен: Красоте девства:

Разслабление обретоша всетелесное расслаблении, завистию стягнении, в субботу расслабленного стягнутие помышляюще, глаголюще: не достоин целити в субботы, разоряти же отеческое субботы покоище, закона Тебе не ведуще Владыку, и целителя душ наших.

Слава, и ныне: тойже.

Таже, Воскресение Христово: псалом 50. Таже каноны праздника со ирмосы, на 8: и Минеи, на 4. Кондак и ексапостиларий праздника.

Песнь 1.

Ирмос: Дивно, славно, творяй чудеса, Ты еси Бог, бездну оземленивый, и колесницы потопивый, и люди спасый поющыя Тебе, яко Царю нашему и Богу.

Действуяй знамения, творяй чудеса Едине Царю, распятие волею претерпел еси, яко Щедр, и смерть смертию умертвив, оживотворил еси нас.

Во Христове востании людие днесь ликуим верно, пленен бысть ад, юзники яже содержаше, отдаде со тщанием, поющия величия Божия.

Силою Божественною, иногда ослабленного словом Твоим Христе стянувший, и повелевший ему одр взяти, многим временем немощствующую люте душу мою исцели.

В купель иногда овчую ангел сходяше, и единого исцелеваше на всякое лето: крещением же Божественным ныне очищает безчисленная множества Христос.

Архангелу Михаилу: **Н**ачальниче ангелов, архистратиге вышних служителей, собравшися в честном храме твоём, и Бога воспевающия, покрывай и сохраняй от всяких искушений.

Троицен: **В** трех Лицех, едином же Естестве Безначального Бога поим непрестанно со безплотными, Отца, Слова и Духа, Царство и Державу имуща нераздельную.

Богородичен: **Ч**тущий сей Чистая град Твой всегда верно, спасай от бед, пленения варварскаго, междоусобныя брани, и меча, и всякаго иного прещения.

И святого Минея на 4.

Песнь 3.

Ирмос: **Н**еплодна душе и безчадная, стяжи плод благославный, веселящися возопий: утвердихся Тобою Боже, несть свят, несть праведен, паче Тебе Господи.

Зря Тебе иногда солнце на древе висяща Слове, свет скры, и трясашеся земля вся, мертвии восташа, мертву бывшу Тебе Всесильне.

С душею пришедшу Тебе во утробу земли, души яже стяжа ад, издаваше со тщанием, вопиющия державе Твоей песнь благодарную, Едине Господи.

В летех многих немощствующую люте душу мою Преблагий исцели, якоже ослабленного прежде, яко да последую Твоим стезям, яже показал еси любящим Тя.

Архангелу Михаилу: **С** вышними чинми Божий архангеле, мольбу сотвори о верою поющих тя, соблюдая и храня нас, житейскими страстьми нападаемых.

Троицен: **С**лава Отцу возопиим, Сыну, и Духу, Един бо есть естеством Бог, Егоже силы вся Небесныя со страхом славят, Свят, Свят, Свят еси зовуще.

Богородичен: **Б**езсеменное имела еси зачатие, и паче ума Рождество, Дево Мати Чистая: дело страшное, чудо превелие, ангелы почитаемое и человеки славимое, Отроковице Владычице.

И святого Минея на 4.

Кондак и седален святого.

И седален, глас 3-й:

Глагол разслабленного токмо стягну, яко Всемирное Слово Едино, нас ради на земли Явльшагося за благоутробие. Темже и одр нося мимоходяще, аще и книжницы зрети содеянное не терпяху, злобы содержими завистию, души разслабляюще.

Слава, и ныне, Богородичен:

Красоте девства Твоего, и пресветлой чистоте Твоей, Гавриил удивився, вопияше Ти Богородице: кую Ти похвалу принесу достойную? Что же возименую Тя? Недоумеваю и ужасаюся. Темже, якоже повелен бых, вопию Ти: радуйся, Благодатная.

Песнь 4.

Ирмос: Приосененную гору, Аввакум прозяше Пречистую Твою утробу Чистая. Тем зываше: от юга придет Бог, и Святыи от горы приосененныя чащи.

Еврейский собор завистию растаяваемъ, на древе распят Тя, Господи: и разорив осуждение смерти, яко Силен востал еси, мир с Собою совоздвигнув.

С мурны жены, что неистощимое муро ищете? Востал еси, муроносицам рече, седая в белых ризах, поднебесную исполнив мысленнаго благоухания.

Рабий нося образ, за многое благоутробие ходяй пришел еси, и здрава показал еси, во многих летех лежащаго, Слове, повелев и одр взяти.

Ангел убо Господень, на всякое лето сходя, воду в купели возмущаше, совершая здрава единаго точно: Христос же множество безчисленное Божественным крещением спасает.

Архангелу Михану: Начальниче ангелов и наставниче заблуждающих, Господень начальный Воеводо, в час сей посреде нас прииди, и молитвы всех принеси Единому Творцу и Владыце.

Троицен: Соединяемая Естеством, и разделяемая лица, есть Святая Троица, Отец Пресущный, Соприсносущный же Сын, и Святыи и Единый Всесильный Дух.

Богородичен: Чистая, како доиши? Како же родила еси Младенца, Адама Древнейшаго? Како на руку носиши Сына, Сущаго на раму херувимску, яко знает, якоже вестъ, вся Осуществовавый.

И святого Минея на 4.

Песнь 5.

Ирмос: Светом Твоим невечерним Христе, озари Боже смиренную мою душу, и настави на страх Твой, зане свет повеления Твоя.

Вознесыйся на древе крестнем, и совознесый мир весь, и быв в мертвых Боже, от века мертвыя воздвизаеши.

Воскресе якоже рече Христос, истощивый вся адова царствия, и является апостолом, радость подавая вечнуюющую.

Белообразен виден бысть женам блистайся ангел: не кому плачите, Жизнь ваша воста, сущия во гробех мертвыя Оживившая.

Разслабленнаго яко воздвигл еси Христе, ослабленную мою душу преступленьми оздрави, и шествовати мне Твоя правая стези споспешествуй.

Архангелу Михаилу: Ангелов наставниче Михаиле, собирающыяся в храме твоём люди днесь, и проповедающыя Божия величия спасай.

Троицен: Равночестная Трчисленная Единице, разделяемая убо верно Ипостасьми, соединяемая же Естеством есть, Отец, Сын и Божественный Дух.

Богородичен: Безсеменное Рождество Твое Чистая, непостижимое поем Рождение, блажаще Тя яко Матерь Творца всех и Владыки.

И святого Минея на 4.

Песнь 6.

Ирмос: Глубина страстей воста на мя, и буря противных ветров, но предварив мя Ты спаси, Спасе, и избави от тли, яко спасл еси от зверя пророка.

Вознесыйся волею на древо, положился еси яко мертв во гробе, и сущия во аде мертвыя вся вкупе оживив Христе, воскресил еси Божественною силою.

Ад срет Тя Щедре доле огорчися, связанныя отдавая со тцанием, Твое страшное поющыя Спасе Воскресение, во гласех немолчных.

Божествении ученицы, видевши Жезнь всех из гроба воставша Христа, любовию мноюю, и нравом правым, и веселием душевным покланяхуся.

Древле на одре болезненном, в letech мнозех слежай, Твоим Христе повелением исцелев, славит воспевая благоутробие Твое, Жизнодателю.

Архангелу Михаилу: Ангелов наставниче Михаиле, предстояй престолу Владычню, прииди посреде нас, наставляя к стезям жизни, тебе предстателя тепла стяжавших.

Троицен: Троицу лица чту, единицу же существом проповедаю, Безначальне Отче, Сыне, Душе Правый: Боже всех, с Вышними страшными воинствы.

Богородичен: Вся Божественным мановением носяй, держимь есть Богородице Дево во объятиях Твоих, всех нас восхищая, от руки работы лукаваго, яко Щедр.

И святого Минея на 4.

Кондак, глас 3-й:

Душу мою Господи, во гресех всяческих, и безместными деяньми разслаблену, воздвигни Божественным Твоим предстательством, якоже и разслабленного воздвигл еси древле, да зову Ти спасаемь: Щедрый, слава Христе державе Твоей.

Икос: Руки Твоя горстию содержи концы Иисусе Боже, Отцу Собезначальный, и Духу Святому совладычествуяй всеми, плотию явился еси, недуги исцеляя, и страсти отгнал еси: слепцы просветил еси, и разслабленного словом Божественным ты возставил еси, сему напрасно ходити повелев, и сего носивший одр на раму взяти. Темже вси с ним воспеваем и возопиим: Щедрый, слава Христе, державе Твоей.

Песнь 7.

Ирмос: Пламень оросивый пещный, и отроки неопалимы спасый, благословен еси во веки, Господи Боже отец наших.

Простерта Тя на древе яко зряше, свет скры солнце, не могущее мірови светити, Тебе волею зашедшу Всецарю, на просвещение всех языков.

Воскресл еси истощивый гробы, и пленивый ад силою всецельною: темже поем честное Твое Христе и Божественное Востание.

Яко мертва что Живаго ищете? Воста, несть во гробе, мвроносицам вопияше древле блистаяся зраком Божественный ангел.

Слежаша в летех мнозех разслабленного словом исцеливый, вопиял еси: возми одр твой и ходи, поя величия Божия.

Архангелу Михаилу: Михаиле начальный воеводо Господень, верно в Божественном твоём храме собирающихся, во хваление Божие наставляя, покрывай от всяких зол ходатайством твоим.

Троицен: О Троице, верою поющия Тя, яко Бога всех и Владыку, от всяких бед спасай, и Твоих благ причастники сотвори.

Богородичен: Девствуещи рождши паче слова, прежде всех век Рождшагося от Безначальна Отца Нетленного: сего ради Чистая, Тебе уболажаем.

И святого Минея на 4.

Песнь 8.

Ирмос: Ангельми немолчно в вышних славимаго Бога, небеса небес, земля и горы, и холми, и глубина, и весь род человеческий, песньми Того, яко Создателя и Избавителя благословите и превозносите во вся веки.

Завеса раздрася распеншуся Тебе Спасе наш, и отдаваше мертвыя, яже пожре смерть: и ад обнажися, Тебе зря в преисподних земли бывша.

Где твое жало есть, смерти? Где твоя аде, ныне победа? Воскреспу Царю, умертвился еси и погибл, не ктому царствуещи: Крепкий бо взят яже имел еси связанныя.

Тещьте скоро, возвестите апостолом Воскресение, муриносицам явлейся юноша вещаше: воскрес Владыка и с ним иже от века мертвии преславно.

Леты многими слежай разслабленный взываше: помилуй мя, Избавителю, недоумением содержи. Сей же повелевает ему взять тцательно одр, и право ступати.

Архангелу: Яко невестственных предводитель архистратиже сил, с нами проси нам прегрешений избавление, исправление же жития, и тамошних наслаждение благ вечных.

Троичен: Несозданное, непресекомое Существо, Триипостасное Божество, Отца Безначальна Бога, и Сына, и Духа Святого воспоим согласно, серафимскую зовуще страшную песнь.

Богородичен: Свиток Тя зряше Исаия Приснодево, в немже перстом Отчим, Слово Безлетное написася, от всякаго безсловесия спасающее нас, словесы Тя священными воспевающих.

И святого Минея на 4.

И поем Честнейшую:

Песнь 9.

Ирмос: На Синайстей горе виде Тя в купине Моисей, неопально огонь Божества заченшую во чреве: Даниил же Тя виде, гору несекому: жезла прозябший, Исаия взываше, от корене Давидова.

Иисусе на древе возвышаемъ, совознесл еси нас, и положився волею во гробе, из гробов мертвыя воскресил еси вся, поющыя державу Твою непостижимую, и силу Твою непобедимую.

Краснейший от гроба возсиял еси, яко Жених от чертога, краснейший Слове, и разрушил еси ада мрачное, и юзники извел еси, согласно зовущыя: слава славе Твоей, слава Иисусе Боже, востанию Твоему.

Воздыхания же и слезы носяща, с муры во тцании всесвятый гроб достигоша жены, и Христову учими бяху верою славному Востанию, еже празднуем в радости душевней веселящися.

Последоваше здравие тела, повелению Твоему Христе, и видимъ бяше прежде разслабленный, текий со тцанием, и одр носяй, на немже возлежал е леты многими, песнослова многую Твою силу.

Архангелу Михаилу: Просвещение нам испроси, Великий Архистратиге, присно Свету Великому предстояй, и умири нашу жизнь, напастьми всегда змиевыми и обстояньми жития зыблемую присно, достохвальне.

Троичен: Свет и Светове, Жизнь же и Жизни, славлю Тя всеблагочестно, Отче, Слове и Душе Святый, Троиипостасная Единице, Неразделимая Державо, Божество Неслитное, Свят, Свят, Свят, вопия с вышними силами.

Богородичен: От светоносных пройде ложесн Твоих Великое Солнце Христос, и мир просвети Пречистая, осияньми светлыми, и тму отъят преступления: темже поем Тя яко вину всех добрых, Богоневесто.

И святого Минея на 4.

Катавасия: Светися, светися

Екзапостилларий,

Подобен: Жены услышите:

Предста Человеколюбец и Всещедрый Господь овчей купели, еже исцелити недуги: обрете же человека слежаща многими леты, и к нему возопи: возми одр и иди на пути правыя.

Слава, и ныне, тойже.

На хвалитех поставим стихи 4, и поем настояция стихиры, повторяюще первую, глас 3-й

Поведаша вся чудеса стражие Твои Господи: но собор суеты исполни мздою десницу их, скрыти мняше Воскресение Твое, еже мир славит: помилуй нас. [Дважды.]

Разсеянный мой ум собери Господи, и оляденевшее сердце мое очисти, яко Петру дай мне покаяние, яко мытарю воздыхание, и яко блуднице слезы, да велиим гласом взываю Ти: Боже, спаси мя, яко един Благоутробен и Человеколюбец.

Мученичен: Царей и мучителей страх отринуша Христовы воины, и благодерзновенно и мужески Того исповедаша всех Господа Бога, и Царя нашего: и молятся непрестанно о душах наших.

Слава, и ныне: глас 8-й

Господи, разслабленнаго не купель исцели, но Твое слово обнови, и ниже многолетний запят ему недуг: яко гласа Твоего скорейшее действо показася, и неудобноносимую тяжесть отверже, и бремя одра понесе, во свидетельство множества щедрот Твоих, слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 3-й.

Подобен: Велия Креста:

Явися разслабленным удесем слово Твое, якоже связание живоносное, Животворче мой Слове, егоже свидетельство, паче надежди одра взятие: егоже повелен ношаше, слежав на нем на мнозе.

Стих: Милости Твоя Господи, во век воспою.

Радуюся исполняет повеление разслабленный, Твоя всесильная Владычня крепости, и одр свой нося хождаше, и свидетельствуя взываше: исцеливый сие мне творити повелевает.

Стих: Яко рекл еси: в век милость созиждется.

В летех многих и временех слежай, помилуй мя, зовет разслабленный удесы, Свободителю Христе, связана недоумением, и Спас одр взяти повелеваше, стягнув уды.

Слава, и ныне: глас 5:

При Овчей купели, человек лежаше в немощи, и виде Тя Господи, вопияше: человека не имам, да егда возмутится вода, ввержет мя в ню. Егда же прихожду, ин предваряет мя, и приемлет исцеление: аз же немощствуяй лежу. И абие умилиосердився Спас, глаголет к нему: тебе ради Человек быв, тебе ради в плоть облекохся, и глаголеши: человека не имам: возми одр твой и ходи. Вся Тебе возможна, вся послушают, вся повинуются: всех нас помяни, и помилуй Святыи, яко Человеколюбец.

Таже, Благо есть исповедатися Господеви

Трисвятое. И по Отче наш:

Тропарь, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде миру велию милость.

Слава, и ныне, Богородичен, глас 3-й

Таже ектения: Помилуй нас Боже:

Час 1. И отпуст.

ВО ВТОРНИК 4-Й СЕДМИЦЫ ПО ПАСХЕ НА ЛИТУРГИИ

Блаженна Троицы, песнь 4-й праздника, на 6.

Еврейский собор завистию растаяваемъ, на древе распят Тя, Господи: и разорив осуждение смерти, яко Силен востал еси, мир с Собою совоздвигнув.

С мурны жены, что неистоощимое муро ищете? Востал еси, муриносицам рече, седай в белых ризах, поднебесную исполнив мысленного благоухания.

Рабий нося образ, за многое благоутробие ходяй пришел еси, и здрава показал еси, во многих летех лежащаго, Слове, повелев и одр взяти.

Ангел убо Господень, на всякое лето сходя, воду в купели возмущаше, совершая здрава единаго точно: Христос же множество безчисленное Божественным крещением спасает.

Троицен: Соединяемая Естеством, и разделяемая лица, есть Святая Троица, Отец Пресущный, Соприсносущный же Сын, и Святой и Единый Всесильный Дух.

Богородичен: Чистая, како доиши? Како же родила еси Младенца, Адама Древнейшаго? Како на руку носиши Сына, Сущаго на раму херувимску, яко знает, якоже весть, вся Осуществовавый.

По входе тропарь: глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде миру велию милость.

И храма Богородицы, и храма святого. Посем настоящего святого, аще есть. Также кондак храма святого. Слава: святого:

И ныне: праздника: Кондак, глас 3-й:

Душу мою Господи, во гресех всяческих, и безместными деяньми разслаблену, воздвигни Божественным Твоим предстательством, якоже и разслабленнаго воздвигл еси древле, да зову Ти спасаемъ: Щедрый, слава Христе державе Твоей.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 25. [Деян. 10, 21 – 33.]

Во дни оны, сошед Петр к мужем посланным к нему от Корнилия, рече: се, аз есмь, егоже ищете: кая есть вина, еяже ради приидосте? Они же рекоша:

Корнилий сотник, муж праведен и бояйся Бога, свидетелствован от всего языка иудейска, увещен есть от ангела свята призвати тя в дом свой и слышати глаголы от тебе. Призвав же их учреди: наутрие же Петр востав иде с ними, и нецыи от братьий, иже от Иопнии, идоша с ним: И наутрие внидоша в Кесарию. Корнилий же бе чая их, созвав сродники своя и любезныя други. Якоже бысть внити Петру, сrete его Корнилий, и пад на ногу его поклонися. Петр же воздвиже его, глаголя: востани: и аз сам человек есмь. И с ним беседа, вниде и обрете собравшиися многи: Рече же к ним: вы весте, яко не лепо есть мужу иудеанину прилеплятися или приходитьи ко иноплеменику: и мне Бог показати одинаго скверна или нечиста глаголати человека: Темже и без сумнения приидох призван: вопрошаю вы убо, коея ради вины посласте по мене? И Корнилий рече: от четвертаго дне даже до сего часа бех постяся и в девятый час моляся в дому моем: и се, муж ста предо мною во одежди светле И рече: Корнилие, услышана бысть молитва твоя, и милостыни твоя помянушася пред Богом: Посли убо во Иопнию и призови Симона, иже нарицается Петр: сей странствует в дому Симона усмаря близ моря: иже пришед возглаголет тебе. Абие убо послах к тебе, ты же добре сотворил еси пришед: ныне убо вси мы пред Богом предстоим слышати вся повеленная тебе от Бога.

Аллилуиа глас 1-й: Помяни сонм Твой, егже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 25. [Ин. 7, 1 – 13.]

Во время оно, хождаше Иисус в Галилеи: не хотяше бо во Иудеи ходити, яко искаху Его иудее убити. е же близ праздник иудейский, потчение сени. Реша убо к Нему братия Его: преиди отсюду, и иди во Иудею, да и ученицы Твои видят дела Твоя, яже твориши: Никтоже бо в тайне творит что, и ищет сам яве быти: аще сия твориши, яви Себе мирови. Ни братия бо Его вероваху в Него. Глагола убо им Иисус: время Мое не у прииде: время же ваше всегда готово есть: Не может мир ненавидети вас: Мене же ненавидит, яко Аз свидетельствую о нем, яко дела его зла суть: Вы възидите в праздник сей: Аз не възыду {не у възыду} в праздник сей, яко время Мое не у исполнися. Сия рек им, оста в Галилеи. Егда же възыдоша братия Его в праздник, тогда и Сам възыде, не яве, но яко тай. Жидове же искаху Его в праздник, и глаголаху: где есть Он? И ропот мног бе о Нем в народех: овии глаголаху, яко благ есть: инии же глаголаху: ни, но льстит народы. Никтоже убо яве глаголаше о Нем, страха ради иудейскаго.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Хвалите Господа с Небес, хвалите Его в Вышних.
Аллилуиа, [трижды]